

四庫全書

史部

欽定四庫全書

遼史卷三十七

元中書右丞相總裁托克托等修

志第七

地理志一

帝堯畫天下為九州舜以冀青地大分幽并營為州十有二幽州在渤海之間并州北有代朔營州東暨遼海其地負山帶海其民執干戈奮武衛風氣剛勁自古為

用武之地太祖以德呼勒部衆代約尼氏起臨潢建皇
都東併渤海得城邑之居百有三太宗立晉有幽涿檀
薊順營平蔚朔雲應新媯儒武襄十六州於是割古幽
并營之境而跨有之東朝高麗西臣夏國南予石晉而
兄弟趙宋吳越南唐航海輸貢嘻其盛矣遼國其先曰
契丹本鮮卑之地居遼澤中去榆關一千一百三十里
去幽州又七百一十四里南控黃龍北帶潢水冷陁屏
右遼河塹左高原多榆柳下濕饒蒲葦在元魏時有地

數百里至唐達呼哩氏蠶食扶餘室韋奚靺鞨地方二千餘里當貞觀三年以其地置玄州尋置松漠都督府建八部為州置刺史德濟部曰峭落州赫伯部曰彈汗州都呼部曰無逢州芳阿部曰羽陵州圖勒彬部曰日連州芮奚部曰徒河州卓津部曰萬丹州富部曰匹黎赤山二州以達呼哩氏庫克為使持節十州軍事分州建官昉此迨五代闢地東西三千里約尼氏更八部曰達爾扎部伊斯琿部舍琿部諾爾威部婆摩部訥古

濟部濟勒錦部寶衮部屬縣四十有一每部設刺史縣置
令太宗以皇都為上京升幽州為南京改南京為東京
聖宗城中京興宗升雲州為西京於是五京備焉又以
征伐俘戶建州襟要之地多因舊居名之加以私奴置
投下州總京五府六州軍城百五十有六縣二百有九
部族五十有二屬國六十東至于海西至金山暨于流
沙北至臚胸河南至白溝幅員萬里

上京道

上京臨潢府本漢遼東郡西安平之地新莽曰北安平
太祖取天梯博羅等三山之勢于葦甸射金齒箭以識
之謂之龍眉宮神冊三年城之名曰皇都天顯十三年
更名上京府曰臨潢涑流河自西北南流遼京三面東
入于曲江其北東流為按春河又有御河沙河黑河潢
河鴨子河塔魯河狼河蒼耳河輜子河臚朐河陰涼河
豬河鴛鴦湖興國惠民湖廣濟湖鹽灤百狗灤火神淀
馬盂山兒兒山野鵲山鹽山鑿山松山平地松林大斧

山列山庫哩山魯塔山唐所封達呼哩氏勒特王墓存焉戶三萬六千五百轄軍府州城二十五統縣十

臨潢縣太祖天贊初南攻燕薊以所俘人戶散居潢水之北縣臨潢水故以名地宜種植戶三千五百

長泰縣本渤海國長平縣民太祖伐大諲譔先得是邑遷其人於京西北與漢民雜居戶四千

定霸縣本扶餘府強師縣民太祖下扶餘遷其人於京西與漢人雜處分地耕種統和八年以諸宮提轄

司人戶置隸長寧宮戶三千

保和縣本渤海國富利縣民太祖破龍州盡徙富利縣人散居京南統和八年以諸宮提轄司人戶置隸彰愍宮戶四千

潞縣本幽州潞縣民天贊元年太祖破薊州掠潞縣民布於京東與渤海人雜處隸崇德宮戶三千

易俗縣本遼東渤海之民太平九年大延琳結構遼東人叛圍守經年乃降盡遷於京北置縣居之是年

又徙渤海叛人家屬置焉戶一千

遷遼縣本遼東諸縣渤海人大延琳叛擇其謀勇者
置之左右後以城降戮之徙其家屬於京東北故名
戶一千

渤海縣本東京人因叛徙置

興仁縣開泰二年置

宣化縣本遼東神化縣民太祖破鴨綠府盡徙其民
居京之南統和八年以諸宮提轄司人戶置隸彰愍

宮戶四千

上京太祖創業之地負山抱海天險足以為固地沃宜
耕植水草便畜牧金甌一箭二百年之基壯矣天顯元
年平渤海歸乃展郭郭建宮室名以天贊起三大殿曰
開皇安德五鑿中有歷代帝王御容每月朔望節辰忌
日在京文武百官並赴致祭又於內城東南隅建天雄
寺奉安烈考宣簡皇帝遺像是歲太祖崩應天皇后於
義節寺斷腕寘太祖陵即寺建斷腕樓樹碑焉太宗援

立晉造宰相馮道劉煦等持節具鹵簿法服至此册上
太宗及應天皇后尊號太宗詔番部並依漢制御開皇
殿闢承天門受禮因改皇都為上京城高二丈不設敵
樓幅員二十七里門東曰迎春曰鴈兒南曰順陽西曰
金鳳曰西鴈兒曰南福其北謂之皇城高三丈有樓櫓
門東曰安東南曰大順西曰乾德北曰拱辰中有大內
內南門曰承天有樓閣東門曰東華西曰西華北通內
出入之所正南街東留守司衙次鹽鐵司次南門龍寺

街南曰臨潢府其側臨潢縣縣西南崇孝寺承天皇后
建寺西長泰縣又西天長觀西南國子監監北孔子廟
廟東節義寺又西北安國寺太宗所建寺東齊天皇后
故宅宅東有元妃宅即法天皇后所建也其南有聖尼
寺綾錦院內省司麴院贍國省司二倉皆在大內西南
八作司與天雄寺對南城謂之漢城南當橫街各有樓
對峙下列井肆東門之北潞縣又東南興仁縣南門之
東回鶻營回鶻商販留居上京置營居之西南同文驛

諸國信使居之驛西南臨黃驛以待夏國使驛西福先寺寺西宣化縣西南定霸縣縣西保和縣西門之北易俗縣縣東遷遼縣

周廣順中胡嶠記曰上京西樓有邑屋市肆交易無錢而用布有綾錦諸工作宦者翰林伎術教坊角觝儒僧尼道士中國人并汾幽薊為多宋大中祥符九年薛映記曰上京者中京正北八十里至松山館七十里至崇信館九十里至廣寧館五十里至姚家寨館五十里至

咸寧館三十里度潢水石橋旁有饒州唐於契丹嘗置
饒樂今渤海人居之五十里保和館度黑水河七十里
宣化館五十里長泰館館西二十里有佛舍民居即祖
州又四十里至臨潢府自過崇信館乃契丹舊境其南
奚地也入西門門曰金德內有臨潢館子城東門曰順
陽北行至景福門又至承天門內有昭德宣政二殿與
德廬皆東向臨潢西北二百餘里號涼淀在饅頭山南
避暑之處多豐草掘地丈餘即有堅冰

祖州天成軍上節度本遼右八部紳穆里地太祖秋獵
多於此始置西樓後因建城號祖州以高祖昭烈皇帝
曾祖莊敬皇帝祖考簡獻皇帝皇考宣簡皇帝所生之
地故名城高二丈無敵棚幅員九里門東曰望京南曰
大夏西曰液山北曰興國西北隅有內城殿曰兩明奉
安祖考御容曰二儀以白金鑄太祖像曰黑龍曰清秘
各有太祖徵時兵仗器物及服御皮毳之類存之以示
後嗣使勿忘本內南門曰興聖凡三門上有樓閣東西

有角樓東為州廨及諸官廨舍綾錦院班院祇候番漢
渤海三百人供給內府取索東南橫街四隅有樓對峙
下連市肆東長霸縣西咸寧縣有祖山山有太祖天皇
帝廟御靴尚存又有龍門黎谷液山液泉白馬獨石天
梯之山水則南沙河西液泉太祖陵鑿山為殿曰明殿
殿南嶺有膳堂以備時祭門曰黑龍東偏有聖蹤殿立
碑述太祖遊獵之事殿東有樓立碑以紀太祖創業之
功皆在州西五里天顯中太宗建隸弘義宮統縣二城

一
長霸縣本龍州長平縣民遷于此戶二千

咸寧縣本長寧縣破遼陽遷其民置戶一千

越王城太祖伯父裕悅王實嚕西伐党項吐渾俘其民放牧於此因建城在州東南二十里戶一千

懷州奉陵軍上節度本唐歸誠州太宗行帳放牧於此天贊中從太祖破扶餘城下龍泉府俘其人築寨居之會同中掠燕薊所俘亦置此太宗崩葬西山曰懷陵大

同元年世宗置州以奉焉是年有騎十餘獵于祖州西
五十里大山中見太宗乘白馬獨追白狐射之一發而
斃忽不見但獲狐與矢是日太宗崩于灤城後於其地
建廟又於州之鳳凰門繪太宗馳騎貫狐之像穆宗被
害葬懷陵側建鳳凰殿以奉焉有清涼殿為行幸避暑
之所皆在州西二十里隸永興宮統縣二

扶餘縣本龍泉府太宗遷渤海扶餘縣降戶於此世
宗置縣戶一千五百

顯理縣本顯理府人太祖伐渤海俘其王大諲譔遷民於此世宗置縣戶一千

慶州玄寧軍上節度本太保山黑河之地巖谷險峻穆宗建城號黑河州每歲來幸射虎障鷹軍國之事多委大臣後遇戡於此以地苦寒統和八年州廢聖宗秋畋愛其奇秀建號慶州遼國五代祖巴圖貌異常有武略力敵百人衆推為王生于巴圖山因以名沒葬山下在州二百里慶雲山本黑嶺也聖宗駐蹕愛美曰吾萬歲

後當葬此興宗遵遺命建永慶陵有望仙殿御容殿置番漢守陵三千戶並隸大內都總管司在州西二十里有黑山赤山太保山老翁嶺饅頭山興國湖錫沙濼黑河景福元年復置更隸興聖宮統縣二

玄德縣本黑山黑河之地景福元年括落帳人戶從便居之戶六千

孝安縣

富義縣本義州太宗遷渤海義州民於此重熙元年

降義豐縣後更名隸弘義宮

泰州德昌軍節度本契丹二十部族放牧之地因黑鼠族累犯通化州民不能禦遂移東南六百里來建城居之以近本族黑鼠穴居膚黑吻銳類鼠故以名州隸延慶宮兵事屬東北統軍司統縣二

樂康縣倚郭

興國縣本山前之民因罪配遞至此興宗置縣戶七

百

長春州韶陽軍下節度本鴨子河春獵之地興宗重熙八年置隸延慶宮兵事屬東北統軍司統縣一

長春縣本混同江地燕薊犯罪者流配於此戶二千
烏州靜安軍刺史本烏丸之地東胡之種也遼北大王
布拉占為牧建城後官收隸興聖宮有遼河夜河烏丸
川烏丸山統縣一

愛民縣布拉王從軍南征俘漢民置于此戶一千

永州永昌軍觀察承天皇太后所建太祖於此置南樓

乾亨三年置州于皇子罕巴墓側東潢河南土河二水合流故號永州冬月牙帳多駐此謂之冬巴納有木葉山上建契丹始祖之廟奇善汗在南廟哈屯在北廟繪塑二聖并八子神像相傳有神人乘白馬自馬孟山浮土河而東有天女駕青牛車由平地松林泛潢河而下至木葉山二水合流相遇為配偶生八子其後族屬漸盛分為八部每行軍及春秋時祭必用白馬青牛示不忘本云興王寺有白衣觀音像太祖援石晉主中國自

潞州迴入幽州幸大悲閣指此像曰我夢神人令送石
郎為中國帝即此也因移木葉山建廟春秋告賽尊為
家神興軍必告之乃合符傳箭於諸部又有高淀山柳
林淀亦曰馬淀隸彰愍宮統縣三

長寧縣本顯德府縣名太祖平渤海遷其民於此戶
四千五百

義豐縣本鐵利府義州遼兵破之遷其民於南樓之
西北仍名義州重熙元年廢州改今縣在州西北一

百里又嘗改富義縣屬慶州始末不可具考今兩存之戶一十五百

慈仁縣太宗以皇子濟色古勒亡置慈州墳西重熙元年州廢改今縣戶四百

儀坤州啟聖軍節度本契丹右大部地應天皇后建州回鶻諾蘇居之至四世孫庸安穆嚕生應天皇后舒嚕氏適太祖太祖開拓四方平渤海后有力焉俘掠有伎藝者多歸帳下謂之舒新以所生之地置州州建啟聖

院中為儀寧殿太祖天皇帝應天地皇后銀像在焉隸
長寧宮統縣一

廣義縣本回鶻部牧地應天皇后以四征所俘居之
因建州縣統和八年以諸宮提轄司戶置來遠縣十
三年併入戶二千五百

龍化州興國軍下節度本漢北安平縣地契丹始祖奇
善汗居於此稱龍庭太祖建東樓唐天復二年太祖為
德呼勒部額爾奇木破代北遷其民建城居之明年伐

女直俘數百戶實馬天祐元年增修東城制度頗壯麗
十三年太祖於城東金鈴岡受尊號曰大聖大明天皇
帝建元神冊天顯元年崩于東樓太宗升節度隸彰愍
宮兵事屬北路女直兵馬司刺史州一未詳統縣一

龍化縣太祖東伐女直南掠燕薊所俘建城置邑戶
一千

降聖州開國軍下刺史本大部落東樓之地太祖春月
行帳多駐此應天皇后夢神人金冠素服執兵仗貌甚

丰美異獸十二隨之中有黑兔躍入后懷因而有娠遂
生太宗時黑雲覆帳光照室有聲如雷諸部異之穆
宗建州四面各三十里禁樵採放牧先屬延昌宮後隸
彰愍宮統縣一

永安縣本龍原府慶州縣名太祖平渤海破懷州之
永安遷其人置寨於此建縣戶八百

饒州匡義軍中節度本唐饒樂府地貞觀中置松漠府
太祖完葺故壘有潢河長水濼穆丹河青山大福山松

山隸延慶宮統縣三

長樂縣本遼城縣名太祖伐渤海遷其民建縣居之
戶四千內一千戶納鐵

臨河縣本永豐縣人太宗分兵伐渤海遷於潢水之
曲戶一千

安民縣太宗以渤海諸邑所俘雜置戶一千

頭下軍州皆諸王外戚大臣及諸部從征俘掠或置生
口各團集建州縣以居之橫帳諸王國舅公主許創立

州城自餘不得建城郭朝廷賜州縣額其節度使朝廷命之刺史以下皆以本主部曲充焉官位九品之下及井邑商賈之家征税各歸頭下唯酒稅課納上京鹽鐵司

徽州宣德軍節度景宗女秦晉大長公主所建媵臣萬戶在宜州之北二百里因建州城北至上京七百里節度使以下皆公主府署戶一萬

成州長慶軍節度聖宗女晉國長公主以上賜媵臣戶

置在宜州北一百六十里因建州城北至上京七百四十里户四千

懿州廣順軍節度聖宗女燕國長公主以上賜滕臣户置在顯州東北三百里因建州城西北至上京八百里户四千

渭州高陽軍節度駙馬都尉蕭昌裔建尚秦國王隆慶女韓國長公主以所賜滕臣建州城顯州東北二百五十里遼制皇子嫡生者其女與帝女同户一千

壕州國舅宰相南征俘掠漢民居遼東西安平縣故地
在顯州東北二百二十里西北至上京七百二十里戶
六千

原州本遼東北安平縣地顯州東北三百里國舅金德
俘掠漢民建城西北至上京八百里戶五百

福州國舅蕭寧建南征俘掠漢民居北安平縣故地在
原州北二十里西北至上京七百八十里戶三百

橫州國舅蕭克忠建部下牧人居漢故遼陽縣地因置

州城在遼州西北九十里西北至上京七百二十里有橫山戶二百

鳳州果囉國故地渤海之安寧郡境南王府五帳分地在韓州北二百里西北至上京九百里戶四千

遂州本高州地南王府五帳放牧於此在檀州西二百里西北至上京一千里戶五百

豐州本遼澤大部落約尼氏僧隱牧地北至上京三百五十里戶五百

順州本遼隊縣地橫帳南王府倖掠燕薊順州之民建
城居之在顯州東北一百二十里西北至上京九百里
戶一千

閭州羅古王牧地近醫巫閭山在遼州西一百三十里
西北至上京九百五十里戶一千

松山州本遼澤大部落橫帳布庫王牧地有松山北至
上京一百七十里戶五百

豫州橫帳陳王牧地南至上京三百里戶五百

寧州本達呼哩氏勒特山橫帳固寧王牧地在豫州東
八十里西南至上京三百五十里戶三百

邊防城

遼國西北界防邊城因屯戍而立務據形勝不資丁賦
具列如左

靜州觀察本泰州之金山天慶六年升

鎮州建安軍節度本古哈屯城統和二十二年皇太妃
奏置選諸部族二萬餘騎充屯軍專捍禦室韋伊濟等

國凡有征討不得抽移渤海女直漢人配流之家七百餘戶分居鎮防維二州東南至上京三千餘里

維州刺史

防州刺史

河董城本回鶻哈屯城語訛為河董城久廢遼人完之以防邊患高州界女直常為盜劫掠行旅遷其族於此東南至上京一千七百里

靜邊城本契丹二十部族水草地北隣伊濟每入為盜

建城置兵千餘騎防之東南至上京一千五百里

皮被河城地控北邊置兵五百於此防托皮被河出回
紇北東南經伊濟入臚朐河沿河董城北東流合沱漣
河入于海南至上京一千五百里

招州綏遠軍刺史開泰三年以女直戶置隸西北路招
討司

塔哩珠城太康九年置在臚朐河

遼史卷三十七

欽定四庫全書

遼史卷三十八

元中書右丞相總裁托克托等修

志第八

地理志二

東京道

東京遼陽府本朝鮮之地周武王釋箕子因去之朝鮮
因以封之作八條之教尚禮義富農桑外戶不閉人不

為盜傳四十餘世燕屬真番朝鮮始置吏築障秦屬遼東外徼漢初燕人滿王故空地武帝元封三年定朝鮮為真番臨屯樂浪玄菟四郡後漢出入青幽二州遼東玄菟二郡沿革不常漢末為公孫度所據傳子康孫淵自稱燕王建元紹漢魏滅之晉陷高麗後歸慕容垂子寶以勾麗王安為平州牧居之元魏太武遣使至其所居平壤城遼東京本此唐高宗平高麗於此置安東都護府後為渤海大氏所有大氏始保挹婁之東牟山武

后萬歲通天中為契丹盡忠所逼有乞乞仲象者度遼水自固武后封為震國公傳子祚榮建都邑自稱震王併吞海北地方五千里兵數十萬中宗賜所都曰輝罕州封渤海郡王十有二世至曩震僭號改元擬建宮闕有五京十五府六十二州為遼東盛國輝罕州即故平壤城也號中京顯德府太祖建國攻渤海拔輝罕城俘其王大誣謾以為東丹王國立太子朮雲為人皇王以主之神冊四年葺遼陽故城以渤海漢戶建東平郡為

防禦州天顯三年遷東丹國民居之升為南京城名天
福高三丈有樓櫓幅員三十里八門東曰迎陽東南曰
韶陽南曰龍原西南曰顯德西曰大順西北曰大遼北
曰懷遠東北曰安遠宮城在東北隅高三丈具敵樓南
為三門壯以樓觀四隅有角樓相去各二里宮牆北有
讓國皇帝御容殿大內建二殿不置宮嬪唯以內省使
副判官守之大東丹國新建南京碑銘在宮門之南外
城謂之漢城分南北市中為看樓晨集南市夕集北市

街西有金德寺大悲寺駙馬寺鐵幡竿在焉趙頭陀寺
留守衙戶部司軍巡院歸化營軍千餘人河朔亡命皆
籍於此東至北烏爾呼赫四百里南至海邊鐵山八百
六十里西至望平縣海口三百六十里北至挹婁縣范
河二百七十里東西南三面抱海遼河出東北山口為
范河西南流為大口入於海東梁河自東山西流與渾
河合為小口會遼河入於海又名太子河亦曰大梁水
渾河在東梁范河之間沙河出東南山西北流徑蓋州

入于海有蒲河清河泃水亦曰泥河又曰薺芋灤水多
薺芋之草駐蹕山唐太宗征高麗駐蹕其巔數日勒石
紀功焉俗稱手山山巔平石之上有掌指之狀泉出其
中取之不竭又有明王山白石山亦曰橫山天顯十三
年改南京為東京府曰遼陽戶四萬六百四轄州府軍
城八十七統縣九

遼陽縣本渤海國金德縣地漢泃水縣高麗改為勾
麗縣渤海為常樂縣戶一千五百

仙鄉縣本漢遼隊縣渤海為永豐縣神仙傳云仙人
白仲理能煉神丹點黃金以救百姓戶一千五百

鶴野縣本漢居就縣地渤海為雞山縣昔丁令威家
此去家千年化鶴來歸集於華表柱以味畫表云有
鳥有鳥丁令威去家千年今來歸城郭雖是人民非
何不學仙塚累累戶一千二百

析木縣本漢望平縣地渤海為花山縣戶一千

紫蒙縣本漢鏤方縣地後佛寧國置東平府領紫蒙

縣後徙遼城并入黃嶺縣渤海復為紫蒙縣戶一千
興遼縣本漢平郭縣地渤海改為長寧縣唐元和中
渤海王大仁秀南定新羅北略諸部開置郡邑遂定
今名戶一千

肅慎縣以渤海戶置

歸仁縣

順化縣

開州鎮國軍節度本濊貊地高麗為慶州渤海為東京

龍原府有宮殿都督慶鹽穆賀四州事故縣六曰龍原
永安烏山壁谷熊山白楊皆廢疊石為城周圍二十里
唐薛仁貴征高麗與其大將溫沙門戰熊山擒善射者
於石城即此太祖平渤海徙其民于大部落城遂廢聖
宗伐新羅還周覽城基復加完葺開泰三年遷雙韓二
州千餘戶實之號開封府開遠軍節度更名鎮國軍隸
東京留守兵事屬東京統軍司統州三縣一

開遠縣本柵城地高麗為龍原縣渤海因之遼初廢

聖宗東討復置以軍額民戶一千

鹽州本渤海龍河郡故縣四海陽接海格川龍河皆廢戶三百隸開州相去一百四十里

穆州保和軍刺史本渤海會農郡故縣四會農水岐順化美縣皆廢戶三百隸開州東北至開州一百二十里統縣一

會農縣

賀州刺史本渤海吉理郡故縣四洪賀送誠吉理石

山皆廢戶三百隸開州

定州保寧軍高麗置州故縣一曰定東聖宗統和十三年升軍遷遼西民實之隸東京留守司統縣一

定東縣高麗所置遼徙遼西民居之戶八百

保州宣義軍節度高麗置州故縣一曰來遠聖宗以高麗王詢擅立問罪不服開泰三年取其保定二州統和末高麗降於此置推場隸東京統軍司統州軍二縣一來遠縣初徙遼西諸縣民實之又徙奚漢兵七百防

戍焉戶一千

宣州定遠軍刺史開泰三年徙漢戶置隸保州

懷化軍下刺史開泰三年置隸保州

辰州奉國軍節度本高麗蓋牟城唐太宗會李世勣攻破蓋牟城即此渤海改為蓋州又改辰州以辰韓得名井邑駢列最為衝會遼徙其民於祖州初曰長平軍戶二千隸東京留守司統縣一

建安縣

盧州立德軍刺史本渤海杉盧郡故縣五山陽杉盧漢陽白巖霜巖皆廢戶三百在京東一百三十里兵事屬南女直湯河司統縣一

熊岳縣西至海一十五里傍海有熊岳山

來遠城本熟女直地統和中伐高麗以燕軍驍猛置兩指揮建城防戍兵事屬東京統軍司

鐵州建武軍刺史本漢安市縣高麗為安市城唐太宗攻之不下薛仁貴白衣登城即此渤海置州故縣四位

城河瑞蒼山龍珍皆廢戶一千在京西南六十里統縣

一

湯池縣

興州興中軍節度本漢海宜縣地渤海置州故縣三盛
吉蒜山鐵山皆廢戶二百在京西南三百里

湯州本漢襄平縣地渤海置州故縣五靈峰常豐白石
均谷嘉利皆廢戶五百在京西北一百里

崇州隆安軍刺史本漢長岑縣地渤海置州故縣三崇

山為木緣城皆廢戶五百在京東北一百五十里統縣

崇信縣

海州南海軍節度本沃沮國地高麗為沙卑城唐李世勣嘗攻焉渤海號南京南海府疊石為城幅員九里都督沃晴椒三州故縣六沃沮驚巖龍山濱海昇平靈泉皆廢太平中大延琳叛南海城堅守經歲不下別部酋長皆被擒乃降因盡徙其民於上京置遷遼縣移澤州

民來實之戶一千五百統州二縣一

臨溟縣

耀州刺史本渤海椒州故縣五椒山貂嶺澌泉尖山
巖澗皆廢戶七百隸海州東北至海州二百里統縣

一

巖澗縣東界新羅故平壤城在縣西南東北至海州
一百二十里

濱州柔遠軍刺史本渤海晴州故縣五天晴神陽謹

池狼山仙巖皆廢戶五百隸海州東南至海州一百二十里

涿州鴨涿軍節度本高麗故國渤海號西京鴨涿府城高三丈廣輪二十里都督神桓豐正四州事故縣三神鹿神化劍門皆廢大延琳叛遷餘黨於上京置易俗縣居之在者戶二千隸東京留守司統州四縣二

弘聞縣

神鄉縣

桓州高麗中都城故縣三桓都神鄉湨水皆廢高麗王於此初立宮闕國人謂之新國五世孫釗晉康帝建元初為慕容皝所敗宮室焚蕩戶七百隸涿州在西南二百里

豐州渤海置盤安郡故縣四安豐渤恪隰壤硤石皆廢戶三百隸涿州在東北二百一十里

正州本沸流王故地國為公孫康所併渤海置沸流郡有沸流水戶五百隸涿州在西北三百八十里統

縣一

東那縣本漢東曉不而縣地在州西七十里

慕州本渤海安遠府地故縣二慕化崇平久廢戶二百隸涿州在西北二百里

顯州奉先軍上節度本渤海顯德府地世宗置以奉顯陵顯陵者東丹人皇王墓也人皇王姓好讀書不喜射獵購書數萬卷置醫巫間山絕頂築堂曰望海山南去海一百三十里大同元年世宗親護人皇王靈駕歸自

汴京以人皇王愛醫巫閭山水奇秀因葬焉山形掩抱
六重於其中作影殿制度宏麗州在山東南遷東京三
百餘戶以實之應歷元年穆宗葬世宗於顯陵西山仍
禁樵採有十三山有沙河隸長寧積慶二宮兵事屬東
京都部署司統州三縣三

奉先縣本漢無慮縣即醫巫閭幽州鎮山世宗析遼
東長樂縣民以為陵戶隸長寧宮

山東縣本漢望平縣穆宗割渤海永豐縣民為陵戶

隸積慶宮

歸義縣初置顯州渤海民自來助役世宗嘉憫因籍其人戶置縣隸長寧宮

嘉州嘉平軍下刺史隸顯州

遼西州阜成軍中刺史本漢遼西郡地世宗置州隸長寧宮屬顯州統縣一

長慶縣統和八年以諸宮提轄司人戶置

康州下刺史世宗遷渤海率賓府人戶置屬顯州初

建長寧宮後屬積慶宮統縣一

率賓縣本渤海率賓府地

宗州下刺史在遼東石熊山耶律隆運以所俘漢民置
聖宗立為州隸文忠王府王薨屬提轄司統縣一

熊山縣本渤海縣地

乾州廣德軍上節度本漢無慮縣地聖宗統和三年置
以奉景宗乾陵有凝神殿隸崇德宮兵事屬東京都部
署司統州一縣四

奉陵縣本漢無慮縣地括諸落帳戶助營山陵

延昌縣析延昌宮戶置

靈山縣本渤海靈峰縣地

司農縣本渤海麓郡縣併麓波雲川二縣入焉

海北州廣化軍中刺史世宗以所俘漢戶置地在間山之西南海之北初隸宣州後屬乾州統縣一

開義縣

貴德州寧遠軍下節度本漢襄平縣地漢公孫度所據

太宗時察克以所俘漢民置後以弑逆誅没入焉聖宗
建貴德軍後更名有沱河大寶山隸崇德宮兵事屬東
京都部署司統縣二

貴德縣本漢襄平縣渤海為崇山縣

奉德縣本渤海綠城縣地嘗置奉德州

瀋州昭德軍中節度本挹婁國地渤海建瀋州故縣九
皆廢太宗置興遼軍後更名初隸永興後屬敦睦宮兵
事隸東京都部署司統州一縣二

樂郊縣太祖俘薊州三河民建三河縣後更名

靈源縣太祖俘薊州吏民建漁陽縣後更名

巖州白巖軍下刺史本渤海白巖城太宗撥屬瀋州
初隸長寧宮後屬敦睦宮統縣一

白巖縣渤海置

集州懷衆軍下刺史古陴離郡地漢屬險瀆縣高麗為
霜巖縣渤海置州統縣一

奉集縣渤海置

廣州防禦漢屬襄平縣高麗為當山縣渤海為鐵利郡
太祖遷渤海人居之建鐵利州統和八年省開泰七年
以漢戶置統縣一

昌義縣

遼州始平軍下節度本佛寧國城渤海為東平府唐太
宗親征高麗李世勣拔遼城高宗詔程振蘇定方討高
麗至新城大破之皆此地也太祖伐渤海先破東平府
遷民實之故東平府都督伊蒙陀黑比五州共領縣十

八皆廢太祖改為州軍曰東平太宗更為始平軍有遼河羊腸河錐子河蛇山狼山黑山巾子山隸長寧宮兵事屬北女直兵馬司統州一縣二

遼濱縣

安定縣

祺州祐聖軍下刺史本渤海蒙州地太祖以檀州俘於此建檀州後更名隸弘義宮兵事屬北女直兵馬司統縣一

慶雲縣太祖俘密雲民於此建密雲縣後更名

遂州刺史本渤海美州地採訪使耶律佛德以部下漢民置穆宗時佛德嗣絕沒入焉隸延昌宮統縣一

山河縣本渤海縣併黑川麓川二縣置

通州安遠軍節度本扶餘國王城渤海號扶餘城太祖改龍州聖宗更今名保寧七年以黃龍府叛人燕頗餘黨千餘戶置升節度統縣四

通遠縣本渤海扶餘縣併布多縣置

安遠縣本渤海顯義縣併鵠川縣置

歸仁縣本渤海強師縣併新安縣置

漁谷縣本渤海縣

韓州東平軍下刺史本果羅國舊治柳河縣高麗置鄭

頡府都督鄭高二州渤海因之今廢太宗置三河榆河

二州聖宗併二州置缺延昌宮兵事屬北女直兵馬司

統縣一

柳河縣本渤海粵喜縣地併萬安縣置

雙州保安軍下節度本挹婁故地渤海置安定郡久廢
額哩森王從太宗南征以俘鎮定二州之民建城置州
察克弒逆誅沒入焉初隸延昌宮後屬崇德宮兵事隸
北女直兵馬司統縣一

雙城縣本渤海安夷縣地

銀州富國軍下刺史本渤海富州太祖以銀冶更名隸
弘義宮兵事屬北女直兵馬司統縣三

延津縣本渤海富壽縣境有延津故城更名

新興縣本故越喜國地渤海置銀冶嘗置銀州

永平縣本渤海優富縣地太祖以俘戶置舊有永平寨

同州鎮遠軍下節度本漢襄平縣地渤海為東平寨太祖置州軍曰鎮東後更名隸彰愍宮兵事屬北女直兵馬司統州一未詳縣二

東平縣本漢襄平縣地產鐵撥戶三百採鍊隨征賦輸

永昌縣本高麗永寧縣地

咸州安東軍下節度本高麗銅山縣地渤海置銅山郡
地在漢候城縣北渤海龍泉府南地多山險寇盜以為
淵藪乃招平營等州客戶數百建城居之初號浩里太
保城開泰八年置州兵事屬北女直兵馬司統縣一

咸平縣唐安東都護天寶中治營平二州間即此太
祖滅渤海復置安東軍開泰中置縣

信州彰聖軍下節度本越喜故城渤海置懷遠府今廢

聖宗以地隣高麗開泰初置州以所俘漢民實之兵事屬黃龍府都部署司統州三未詳縣二

武昌縣本渤海懷福縣地析平州提轄司及豹山縣一千戶隸之

定武縣本渤海豹山縣地析平州提轄司併乳水縣人戶置初名定功縣

賓州懷化軍節度本渤海城統和十七年遷烏舍戶置刺史于鴨子混同二水之間後升兵事隸黃龍府都部

署司

龍州黃龍府本渤海扶餘府太祖平渤海還至此崩有黃龍見更名保寧七年軍將燕頗叛府廢開泰九年遷城于東北以宗州檀州漢戶一千復置統州五縣三

黃龍縣本渤海長平縣併富利佐慕肅慎置

遷民縣本渤海永寧縣併豐水扶羅置

永平縣渤海置

益州觀察屬黃龍府統縣一

靜遠縣

安遠州懷義軍刺史屬黃龍府

威州武寧軍刺史屬黃龍府

清州建寧軍刺史屬黃龍府

雍州刺史屬黃龍府

湖州興利軍刺史渤海置兵事隸東京統軍司統縣一

長慶縣

渤海清化軍刺史渤海置兵事隸東京統軍司統縣一

貢珍縣渤海置

郢州彰聖軍刺史渤海置兵事隸北女直兵馬司統縣

一

延慶縣

銅州廣利軍刺史渤海置兵事隸北兵馬司統縣一

析木縣本漢望平縣地渤海為花山縣初隸東京後

來屬

涑州刺史渤海置兵事隸南兵馬司

率賓府刺史故率賓國地

定理府刺史故挹婁國地

鐵利府刺史故鐵利國地

安定府

長嶺府

鎮海府防禦兵事隸南女直湯河司統縣一

平南縣

冀州防禦聖宗建升永安軍

東州以渤海戶置

同州以渤海戶置

吉州福昌軍刺史

麓州下刺史渤海置

荊州刺史

懿州寧昌軍節度太平三年越國公主以媵臣戶置初
曰廣懿軍更曰廣順軍隸上京清寧七年宣懿皇后進
入改今名統縣二

寧昌縣本渤海平陽縣

順安縣

滕州昌永軍刺史

順化城嚮義軍下刺史開泰三年以漢戶置兵事隸東
京統軍司

寧州觀察統和二十九年伐高麗以渤海降戶置兵事
隸東京統軍司統縣一

新安縣

衍州安廣軍防禦以漢戶置初刺史後升軍兵事屬東京統軍司統縣一

宜豐縣

連州德昌軍刺史以漢戶置兵事屬東京統軍司統縣

一

安民縣

歸州觀察太祖平渤海以降戶置後廢統和二十九年伐高麗以所俘渤海戶復置兵事屬南女直湯河司統

縣一

歸勝縣

蘇州安復軍節度本高麗南蘇城興宗置州兵事屬南
女直湯河司統縣二

來蘇縣

懷化縣

復州懷德軍節度興宗置兵事屬南女直湯河司統縣

二

永寧縣

德勝縣

肅州信陵軍刺史重熙十年州民亡入女直取之復置
兵事隸北女直兵馬司統縣一

清安縣

安州刺史兵事隸北女直兵馬司

榮州

率州

荷州

源州

渤海州

寧江州混同軍觀察清寧中置初防禦後升兵事屬東北統軍司統縣一

混同縣

河州德化軍置軍器坊

祥州瑞聖軍節度興宗以鐵驪戶置兵事隸黃龍府都

部署司統縣一

懷德縣

遼史卷三十八

欽定四庫全書

遼史卷三十九

元中書右丞相總裁托克托等修

志第九

地理志三

中京道

中京大定府虞為營州夏屬冀州周在幽州之分秦郡
天下是為遼西漢為新安平縣漢末步奚居之幅員千

里多大山深谷阻險足以自固魏武北征縱兵大戰降者一十餘萬去之松漠其後拓拔氏乘遼建牙於此當饒樂河水之南溫渝河水之北唐太宗伐高麗駐蹕於此部帥蘇支從征有功奚長可度率衆內附為置饒樂都督府咸通以後契丹始大奚族不敢復抗太祖建國舉族臣屬聖宗常過七金山土河之濱南望雲氣有郭郭樓閣之狀因議建都擇良工於燕薊董役二歲郭郭宮掖樓閣府庫市肆廊廡擬神都之制統和二十四年

五帳院進故奚王牙帳地二十五年城之實以漢戶號
曰中京府曰大定皇城中有祖廟景宗承天皇后御容
殿城池湫濕多鑿井泄之人以為便大同驛以待宋使
朝天館待新羅使來賓館待夏使有七金山馬盂山雙
山松山土河統州十縣九

大定縣白霄故地以諸國俘戶居之

長安縣本漢賓從縣以諸部人居之

富庶縣本漢新安平地開泰二年析京民置

勸農縣本漢賓從縣地開泰二年析京民置

文定縣開泰二年析京民置

升平縣開泰二年析京民置

歸化縣本漢柳城縣地

神水縣本漢徒河縣地開泰二年置

金源縣本唐青山縣境開泰二年析京民置

恩州懷德軍下刺史本漢新安平縣地太宗建州開泰中以渤海戶實之初隸永興宮後屬中京統縣一

恩化縣開泰中渤海人戶置

惠州惠和軍中刺史本唐歸義州地太祖俘漢民數百戶免虜山下創城居之置州屬中京統縣一

惠和縣聖宗遷上京惠州民括諸宮院落帳戶置高州觀察唐信州地萬歲通天元年以契丹伊斯琿部置開泰中聖宗伐高麗以俘戶置高州有半頂山樂河屬中京統縣一

三韓縣辰韓為扶餘弁韓為新羅馬韓為高麗開

泰中聖宗伐高麗俘三國之遺人置縣戶五千
武安州觀察唐沃州地太祖俘漢民居木葉山下因
建城以遷之號杏塢新城復以遼西戶益之更曰新
州統和八年改今名初刺史後升有黃栢嶺約囉水
格默勒水屬中京統縣一

沃野縣

利州中觀察本中京阜俗縣統和二十六年置刺史
州開泰元年升屬中京統縣一

阜俗縣唐末契丹漸熾役使奚人遷居琵琶川統和四年置縣初隸彰愍宮更隸中京後置州仍屬

中京

榆州高平軍下刺史本漢臨渝縣地後隸石北平驪城縣唐載初二年析慎州置黎州處靺鞨部落後為奚人所據太宗南征橫帳嘉哩以所俘慎州民置州開泰中沒入屬中京統縣二

和衆縣本新黎縣地

永和縣本漢昌城縣地統和二十二年置

澤州廣濟軍下刺史本漢土垠縣地太祖俘蔚州民
立寨居之採煉陷河銀冶隸中京留守司開泰中置
澤州有松亭關神山九宮嶺石子嶺灤河撒河屬中
京統縣二

神山縣神山在西南

灤河縣本漢徐無縣地屬永興宮

北安州興化軍上刺史本漢女祁縣地屬上谷郡晉

為馮跋所據唐為奚王府西省地聖宗以漢戶置北
安州屬中京統縣一

利民縣本漢且居縣地

潭州廣潤軍下刺史本中京之龍山縣開泰中置州
仍屬中京統縣一

龍山縣本漢交黎縣地開泰二年以習家寨置

松江州勝安軍下刺史開泰中置統和八年省復置
屬中京統縣一

松江縣本漢文成縣地邊松漠商賈會衝開泰二年置縣有松山川

宋王曾上契丹事曰出燕京北門至望京館五十里至順州七十里至檀州漸入山五十里至金溝館將至館川原平曠謂之金溝淀自此入山詰曲登陟無復里堠但以馬行記日約其里數九十里至古北口兩傍峻崖僅容車軌又度德勝嶺盤道數層俗名思鄉嶺八十里至新館過雕窠嶺偏槍嶺四十里至如來館過烏灤河

東有灤州又過黑斗嶺度雲嶺芹菜嶺七十里至柳河
館松亭嶺甚險峻七十里打造部落東南行五十里至
牛山館八十里至鹿兒峽館過蝦蟆嶺九十里至鐵漿
館過石子嶺自此漸出山七十里至富谷館八十里至
通天館二十里至中京大定府城垣卑小方圓纔四里
許門但重屋無築闌之制南門曰朱夏門內通步廊多
坊門又有市樓四曰天方大衢通闕望闕次至大同館
其門正北曰陽德閭闔城內西南隅岡上有寺城南有

園圃宴射之所自過古北口居人草庵板屋耕種但無桑柘所種皆從隴上虞吹沙所壅山上長松鬱然深谷中時見畜牧牛馬橐駝多青羊黃豕

成州興府軍節度晉國長公主以媵戶置軍曰長慶隸上京復改軍名統縣一

同昌縣

興中府本霸州彰武軍節度古孤竹國漢柳城縣地慕容皝以柳城之北龍山之南福德之地乃築龍城構宮

廟改柳城為龍城縣遂遷都號曰和龍宮慕容垂復居焉後為馮跋所滅元魏取為遼西郡隋平高保寧置營州煬帝廢州置柳城郡唐武德初改營州總管府尋為都督府萬歲通天中陷李萬榮神龍初移府幽州開元四年復治柳城八年西徙漁陽十年還柳城後為奚所據太祖平奚及俘燕民將建城命韓知方擇其處乃完葺柳城號霸州彰武軍節度統和中制置建霸宜錦白川等五州尋落制置隸積慶宮後屬興聖宮重熙十年

升興中府有大華山小華山香高山麝香崖天授皇帝
刻石在焉駐龍峪神射泉小靈河統州二縣四

興中縣本漢柳城縣地太祖掠漢民居此建霸城縣
重熙中置府更名

營丘縣析霸城置

象雷縣開泰二年以麥務川置初隸中京後屬

閭山縣本漢且慮縣開泰二年以羅家軍置隸中京
後屬

安德州化平軍下刺史以霸州安德縣置來屬統縣

一

安德縣統和八年析霸城東南龍山從河境戶置
隸乾州更屬霸州置州來屬

黔州阜昌軍下刺史本漢遼西郡地太祖平渤海以
所俘戶居之隸黑水河提轄司世宗置州析宜霸二
州漢戶益之初隸永興宮更隸中京後置府來屬統
縣一

盛吉縣太祖平渤海俘興州盛吉縣民來居因置縣

宜州崇義軍上節度本遼西系縣地東丹王每秋畋于此興宗以定州俘戶建州有墳山松柏連亘百餘里禁樵採浚河累石為堤隸積慶宮統縣二

弘政縣世宗以定州俘戶置民工織絁多技巧

聞義縣世宗置初隸海北州後來屬

錦州臨海軍中節度本漢遼東無慮縣慕容皝置西樂

縣太祖以漢俘建州有大胡僧山小胡僧山大查牙山小查牙山淘河島隸弘義宮統州一縣二

永樂縣

安昌縣

嚴州保肅軍下刺史本漢海陽縣地太祖平渤海遷漢戶雜居興州境聖宗於此建城焉隸弘義宮來屬
統縣一

興城縣

川州長寧軍中節度本唐青山州地太祖弟明王安圖
置會同三年詔為白川州安圖子察克以大逆誅沒入
省白川州初隸崇德宮統和中屬文忠王府統縣三

弘理縣統和八年以諸宮提轄司戶置

咸康縣

宜民縣統和中置

建州保靜軍上節度唐武德中置昌黎縣太祖完葺故
壘置州漢乾祐元年故石晉太后詣世宗求於漢城側

耕墾自贍許於建州南四十里給地五十頃營構房室
創立宗廟州在靈河之南屢遭水害聖宗遷於河北唐
宗州故城初屬武寧軍隸永興宮後屬敦睦宮統縣二
永霸縣

永康縣本唐昌黎縣地

來州歸德軍下節度聖宗以女直五部歲饑來歸置州
居之初刺史後升隸永興宮有三州山六州山五脂山
統州二縣一

來賓縣本唐來遠縣地

隰州平海軍下刺史慕容皝置集寧縣聖宗括帳戶
遷信州大雪不能進建城於此置焉隸興聖宮來屬
統縣一


海陽縣本漢縣瀕海地多鹹鹵置鹽場於此

遷州興善軍下刺史本漢陽樂縣地聖宗平大延琳
遷歸州民置來屬有箭筈山統縣一

遷民縣

潤州海陽軍下刺史聖宗平大延琳遷寧州之民居
此置州統縣一

海濱縣本漢陽樂縣地遷潤州本東京城內渤海
民戶因叛移於此



遼史卷三十九

欽定四庫全書

史部

遼史卷

四十至
四十三

詳校官庶吉士臣何道冲

給事中臣查善長覆勘

總校官編修臣朱鈐

校對官編修臣祁韻士

謄錄監生臣李情

欽定四庫全書

遼東卷四十一

元中書右丞相總裁托克托等修

志第十

地理志四

南京道

南京析津府本古冀州之地高陽氏謂之幽陵陶唐曰
幽都有虞析為幽州高併幽於冀周分并為幽職方東

北幽州山鎮醫巫閭澤藪獮養川河沛浸菑時其利魚
鹽其畜馬牛豕其穀黍稷稻武王封太保奭于燕秦以
其地為漁陽上谷右北平遼西遼東五郡漢為燕國歷
封臧荼盧綰劉建劉澤劉旦常置涿郡廣陽國後漢為
廣平國廣陽郡或合于上谷復置幽州後周置燕及范
陽郡隋為幽州總管唐置大都督府改范陽節度使安
祿山史思明李懷仙朱滔劉怱劉濟相繼割據劉總歸
唐至張仲武張允仲以正得民劉仁恭父子僭爭遂入

五代自唐而晉高祖以遼有援立之勞割幽州等十六州以獻太宗升為南京又曰燕京城方三十六里崇三丈衡廣一丈五尺敵樓戰櫓具八門東曰安東迎春南曰開陽丹鳳西曰顯西清晉北曰通天拱辰大內在西南隅皇城內有景宗聖宗御容殿二東曰宣和南曰大內內門曰宣教改元和外三門曰南端左掖右掖左掖改萬春右掖改千秋門有樓閣毬場在其南東為永平館皇城西門曰顯西設而不開北曰子北西城巔有涼

殿東北隅有燕角樓坊市廨舍寺觀蓋不勝書其外有
居庸松亭榆林之關古北之口桑乾河高梁河石子河
大安山燕山中有瑤嶼府曰幽都軍號盧龍開泰元年
落軍額統州六縣十一

析津縣本晉薊縣改薊北縣開泰元年更今名以燕
分野旅寅為析木之津故民戶二萬

宛平縣本晉幽都縣開泰元年改今名戶二萬二千
昌平縣本漢軍都縣後漢屬廣陽郡晉屬燕國元魏

置東燕郡及昌平縣郡廢縣隸幽州在京北九十里
戶七千

良鄉縣燕為中都縣漢改良鄉縣舊屬涿郡北齊天
保七年省入薊縣武平六年復置唐聖曆元年改固
節鎮神龍元年復為良鄉縣劉守光徙治此在京南
六十里戶七千

潞縣本漢舊縣屬漁陽郡唐武德二年置元州貞觀
元年州廢復為縣有潞水在京東六十里戶三千

安次縣本漢舊縣屬漁陽郡唐武德四年徙至東南五十里石梁城貞觀八年又徙今縣西五里常道城開元二十三年又徙耿就橋行市南在京南一百二十里戶一萬二千

永清縣本漢益昌縣隋置通澤縣唐置武隆縣改會昌天寶初為永清縣在京南一百五十里戶五千武清縣前漢雍奴縣屬漁陽郡水經雍奴者藪澤之名四面有水曰雍不流曰奴唐天寶初改武清在京

東南一百五十里戶一萬

香河縣本武清孫村遼於新倉置權鹽院居民聚集
因分武清香河潞三縣戶置在京東南一百二十里
戶七千

玉河縣本泉山地劉仁恭於大安山創宮觀司煉丹
羽化之術于方士王若訥因割薊縣分置以供給之
在京西四十里戶一千

灤陰縣本漢泉山之霍村鎮遼每季春弋獵於延芳

淀居民成邑就城故瀋陰鎮後改為縣在縣東南九
十里延芳淀方數百里春時鵝鶩所聚夏秋多菱芡
國主春獵衛士皆衣墨綠各持連鎗鷹食刺鵝雉列
水次相去五七步上風擊鼓驚鶩稍離水面國主親
放海東青鶩擒之鶩墜恐鶩力不勝在列者以佩錐
刺鶩急取其腦飼鶩得頭鶩者例賞銀絹國主皇族
郡臣各有分地戶五千

宋王曾上契丹事曰自雄州白溝驛渡河四十里至新

城縣古督亢亭之地又七十里至涿州北渡范水劉李河六十里至良鄉縣渡盧溝河六十里至幽州號燕京子城就羅郭西南為之正南曰啟夏門內有元和殿東門曰宣和城中坊閤皆有樓有閔忠寺本唐太宗為征遼陣亡將士所造又有開泰寺魏王耶律漢寧造皆邀朝使遊觀南門外有裕悅王廨為宴集之所門外永平館舊名碣石館請和後易之南即桑乾河

順州歸化軍中刺史秦上谷漢范陽北齊歸德郡境

隋開皇中粟末靺鞨與高麗戰不勝厥稽部長突地稽率八部勝兵數千人自扶餘城西北舉落內附置順州以處之唐武德初改燕州會昌中改歸順州唐末仍為順州有溫榆河白遂河曹王山曾操常駐軍于此黍谷山鄒衍吹律之地南有齊長城城東北有華林天柱二莊遼建涼殿春賞花夏納涼初軍曰歸寧後更名統縣一

懷柔縣唐貞觀六年置治五柳城改順義縣開元

四年置松漠府彈汗州天寶元年改歸化縣乾元元年復今名戶五千

檀州武威軍下刺史本燕漁陽郡地漢為白檀縣魏書曹公歷白檀破烏丸於柳城續漢書白檀在右北平元魏創密雲郡兼置安州後周改為元州隋開皇十八年割燕樂密雲二縣置檀州唐天寶元年改密雲郡乾元元年復為檀州遼加今軍號有桑溪鮑丘山桃花山螺山統縣二

密雲縣本漢白檀縣後漢以居斤奚元魏置密雲
郡領白檀要陽密雲三縣高齊廢郡及二縣來屬
戶五千

行唐縣本定州行唐縣太祖掠定州破行唐盡驅
其民北至檀州擇曠土居之凡置十寨仍名行唐
縣隸彰愍宮戶三千

涿州永泰軍上刺史漢高祖六年分燕置涿郡魏文
帝改范陽郡晉為范陽國元魏復為郡隋開皇二年

罷郡屬幽州大業三年以幽州為涿郡唐武德元年
郡廢為涿縣七年改范陽縣大厯四年置涿州石晉
以歸太祖有大房山六聘山涿水樓桑河橫溝河禮
遜河祁溝河統縣四

范陽縣本漢涿縣唐武德中改范陽縣有涿水范
水戶一萬

固安縣本漢方成縣先屬廣陽國隋開皇九年自
易州涿水縣移置屬幽州取漢故安縣名唐武德

四年屬北義州徙治章信堡貞觀二年義州廢移
今治復屬幽州在州東南九十里戶一萬

新城縣本漢新昌縣唐大厯四年析固安縣置後
省後唐天成四年復析范陽縣置在州南六十里
戶一萬

歸義縣本漢易縣地齊併入鄭縣唐武德五年置
北義州州廢復置縣來屬民居在巨馬河南僑治
新城戶四千

易州高陽軍上刺史漢為易故安二縣地隋置易州
隋末為上谷郡唐武德四年復易州天寶元年仍上
谷郡乾元元年又改易州五代隸定州節度使會同
九年孫方簡以其地來附應歷九年為周世宗所取
後屬宋統和七年攻克之升高陽軍有易水涑水狼
山太寧山白馬山統縣三

易縣本漢縣故城在今縣東南六十里齊天保七
年省隋開皇十六年於故安城西北隅置縣即今

縣治也戶二萬五千

涑水縣本漢道縣今縣北一里故道城是也元魏移於故城南即今縣置周太象十八年改涑水縣在州東四十里有涑水戶二萬七千

容城縣本漢縣先屬涿郡故城在雄州西南唐武德五年屬北義州貞觀元年還來屬聖曆三年改全忠縣天寶元年復名容城縣在州東八十里戶民皆居巨馬河南僑治涿州新城戶五千

薊州尚武軍上刺史秦漁陽右北平二郡地隋開皇
中徙治玄州總管府煬帝改漁陽郡唐武德元年廢
入幽州開元十八年分立薊州統縣三

漁陽縣本漢縣屬漁陽郡晉省復置元魏省唐屬
幽州開元十八年置薊州有鮑丘水戶四千

三河縣本漢臨胙縣地唐開元四年析潞州置戶
三千

玉田縣本春秋無終子國漢置無終縣屬右北平

郡元魏屬漁陽郡治省唐武德二年復置貞觀初
省乾封中復置萬歲通天元年更名玉田屬幽州
開元四年還屬幽州八年屬營州十一年又屬營
州十八年來屬搜神記雍伯洛陽人性孝父母沒
焚無終山山高八十里上無水雍伯置飲人有就
飲者與石一斗種生玉因名玉田戶三千

景州清安軍下刺史本薊州遵化縣重熙中置戶三
千

遵化縣本唐平州買馬監為縣來屬

平州遼興軍上節度商為孤竹國春秋山戎國秦為遼
西右北平二郡地漢因之漢末公孫度據有傳子康孫
淵入魏隋開皇中改平州大業初復為郡唐武德初改
州天寶元年仍北平郡後唐復為平州太祖天贊二年
取之以定州俘戶錯置其地統州二縣三

盧龍縣本肥如國春秋晉滅肥子奔燕受封於此
漢晉屬遼西郡元魏為郡治兼立平州北齊屬北平

郡隋開皇中省肥如入新昌十八年改新昌曰盧龍
唐為平州後因之戶七千

安喜縣本漢令支縣地久廢太祖以定州安喜縣倅
戶置在平州東北六十里戶五千

望都縣本漢海陽縣久廢太祖以定州望都縣倅戶
置有海陽山縣在州南三十里戶三千

灤州永安軍中刺史本古黃洛城灤河環繞在盧龍
山南齊桓公伐山戎見山神俞兒即此秦為右北平

漢為石城縣後名海陽縣漢末為公孫度所有晉以後屬遼西石晉割地在平州之境太祖以俘戶置灤州負山帶河為朔漢形勝之地有扶蘇泉甚甘美秦太子扶蘇北築長城常駐此臨榆山峰巒崛起高千餘仞下臨榆河統縣三

義豐縣本黃洛故城黃洛水北出盧龍山南流入於濡水漢屬遼西郡久廢唐季入契丹世宗置縣戶四千

馬城縣本盧龍縣地唐開元二十八年析置縣以
通水運東北有千金冶東有茂鄉鎮遼割隸灤州
在州西南四十里戶三千

石城縣漢置屬右北平郡久廢唐貞觀中於此置
臨榆縣萬歲通天元年改石城縣在灤州南三十
里唐儀鳳石刻在焉今縣又在其南五十里遷徙
置以就鹽官戶三千

營州隣海軍下刺史本高孤竹國秦屬遼西郡漢為

昌黎郡前燕慕容皝徙都于此元魏立營州領昌黎
建德遼東樂浪翼陽營丘六郡後周為高寶寧所據
隋開皇置州大業改遼西郡唐武德元年改營州萬
歲通天元年始入契丹聖歷二年僞治漁陽開元五
年還治柳城天寶元年改曰柳城郡後唐復為營州
太祖以居定州俘戶統縣一

廣寧縣漢柳城縣屬遼西郡東北與奚契丹接境
萬歲通天元年入契丹李萬營神龍元年移幽州

界開元四年復舊地遼改今名戶三千

遼史卷四十

遼史卷四十考證

地理志四宛平縣本晉幽都縣按清類天文分野之書唐建中元年朱滔立燕都縣石晉割地賂遼遼改幽都縣統和二十二年改宛平據此則本晉幽都縣似誤且統和二十三年訛作開泰元年

遼史卷四十考證